

## Tabell 3-k

### Anslag på frie inntekter i 2017. Kommunane

Tabell 3 viser anslag på vekst i frie inntekter for kommunane frå 2016 til 2017. Som frie inntekter reknast her skatt på inntekt og formue (inkl. naturressursskatt) og rammetilskot. Tabellen viser veksten etter anslag på rekneskap for 2016. Alle tala er i nominelle kroner. Prisveksten i kommunesektoren i 2016–2017 er anslått til 2,5 pst.

Skatteinntektene, inkl. skatteutjamning, er den storleiken det er knytt mest uvisse til i veksten. Skatteinntektene blir anslått ut ifrå det samla skatteanslaget for 2016 og 2017 for kommunane, og kommunane sine skatteinntekter i 2015. For skatt på inntekt og formue tek ein for kvar kommune utgangspunkt i skatt per innbyggjar i 2015, framskrive med innbyggjartalet i 2016. Ut ifrå skatt 2015 framskrive med innbyggjartal 2016, blir det rekna ut kva del som kvar kommune får av berekna samla skatt. Den delen blir nytta til å fordele samla skatteanslag på inntekt og formue mellom kommunane både for 2016 og 2017.

Anslag på skatteutjamning er inkludert i skatteanslaget. For 2016 og 2017 er utjamninga i skatteinntektene for kommunane 60 prosent. Kommunar med skatteinntekter under 90 pst. av landsgjennomsnittet får ein tilleggskompensasjon som blir finansiert av alle kommunar med eit likt trekk per innbyggjar. I utrekninga blir naturressursskatten halden konstant, med tal frå inntektsåret 2014.

Tala for rammetilskot 2016 er henta frå nivået i revidert nasjonalbudsjett for 2016. I revidert nasjonalbudsjett vart innbyggjartilskotet redusert med 873,9 mill. kroner i forbindelse med forsøket med statleg finansiering av omsorgstenestene. Utrekket vil bli justert med 389 mill. kroner ved nysalderinga av budsjettet hausten 2016, på grunn av at Tønsberg kommune trekte seg frå forsøket etter at revidert nasjonalbudsjett for 2016 blei lagt fram. I berekninga av anslag på vekst i frie inntekter frå 2016 til 2017 er det justerte trekket lagt til grunn.

Rammetilskotet for 2017 er vist i tabell 1-k. Dei kommunevise anslaga på frie inntekter i 2016 og 2017 inkluderer ikkje tilbakehalde skjøn, og veksten i dei frie inntektene blir difor påverka av nivået på tilbakehalde skjøn i dei to åra. Tilbakehalde skjøn kjem i tabell 3-k fram som ufordelte midlar for alle fylke. Den berekna veksten på fylkesnivå blir difor ikkje påverka av nivået på tilbakehalde skjøn.

Fordelinga av det nye regionsentertilskotet i 2017 (100 mill. kroner) er ikkje kjent før i kommuneproposisjonen for 2018, og er difor ikkje inkludert i dei kommunevise eller fylkesvise anslaga på frie inntekter, men er inkludert i landssummen.

For å gjere tala samanliknbare, noko som er ein føresetnad for å kunne berekne veksten, blir frie inntekter for 2016 korrigererte for eventuelle oppgåveendringar, regelendringar og innlemmingar av øyremerkte tilskot i 2017. I 2017 er summen av desse endringane -359,562 mill. kroner for kommunane. Korreksjonar i 2017 er viste i innleiinga til Grønt hefte. Alle oppgåvekorrigeringar er korrigererte på landsnivå, med unntak av korreksjon for saker som blir fordelt med særskilt fordeling (innlemming av tilskot til frivilligsentraler, forsøk med ny oppgave- og ansvarsdeling i barnevernet og

forsøk med statleg finansiering av omsorgstenestene) og korreksjonen for omdisponeringa frå storbytilskotet. I tillegg er rammetilskotet i 2016 korrigert for ein feil i kriteriedata i inntektssystemet i 2016 for Østre Toten kommune og for grenseendringa mellom Sandefjord og Tønsberg kommune i 2017.

Veksten i frie inntekter frå 2016 til 2017 blir berekna frå anslag på rekneskap for 2016. Inntektsveksten frå 2016 til 2017, rekna frå anslag på rekneskap, er nominelt 2,7 prosent.

### **Kolonne 1 – Anslag på frie inntekter i 2016**

Kolonne 1 viser anslag på rekneskap for frie inntekter i 2016. Anslag på rammetilskotet til kommunane, eksklusive skatteutjamning, er henta frå revidert nasjonalbudsjett i 2016, korrigert for uttrekket til kommunar som deltek i forsøk med statleg finansiering av omsorgstenestene. Skatteinntektene er framskrivne i samsvar med skatteanslaget for 2016 som ligg i nasjonalbudsjettet for 2017, med lik vekst for alle kommunar. Dette anslaget inkluderer ei oppjustering av skatteanslaget for 2016 med 3,1 mrd. kroner.

### **Kolonne 2 – Anslag på oppgåvekorrigerede frie inntekter i 2016**

Inntektene i kolonne 2 er anslag på rekneskap korrigert for oppgåveendringar, regelendringar og innlemming av øyremerkte tilskot. Det er teke utgangspunkt i det same anslaget som i kolonne 1. Oppgåveendringane det er korrigerede for er omtalt nærare i tabell B-k og C-k.

### **Kolonne 3 – Anslag på frie inntekter i 2017**

Kolonne 3 viser anslag på frie inntekter i 2017. Anslag på rammetilskotet til kommunane, eksklusive skatteutjamning, er henta frå kolonne 7 i tabell 1-k. Ved berekninga av anslaget på skatteinntektene til kommunane, har departementet teke utgangspunkt i kommunane sine skatteinntekter i 2015. Desse er framskrivne i samsvar med skatteanslaget for 2016 og 2017, som ligg inne i nasjonalbudsjettet for 2017. Skatteanslaget for kvar kommune er deretter lagt til grunn for utrekninga av skatteutjamninga.

### **Kolonne 4 – Anslag på korrigert vekst frå 2016 til 2017**

Kolonne 4 viser anslag på oppgåvekorrigert vekst i frie inntekter frå anslag på rekneskap 2016 til 2017 for kvar kommune i 1 000 kroner (kol. 3 – kol. 2).

### **Kolonne 5 – Anslag på korrigert vekst i prosent frå 2016 til 2017**

Kolonne 5 viser prosentvis oppgåvekorrigert vekst frå anslag på rekneskap 2016 til 2017.